

§. 19. His igitur sic prælibatis ipsam considerabimus Confusionem Lingvarum, & primò qvidem ejus causam efficientem, qvæ non fuit aër Borsippæ, neqve ipsa natura, aut ipse homo, ut alii volunt, sed Deus Ter Opt. Max. fuit autor & causa efficiens hujus confusionis. Sic enim ejus Cancellarius Moses hac de re scribit Gen. IX. 6. 7. 8. 9. Dixit יְהוָה Dominus : En populus unus &c. Age descendamus & confundamus labium eorum &c. Dispersit itaque Dominus &c. Propterea vocavit nomen ejus Babel, qvòd illic confudisset labium universæ terræ. Qvibus verbis disertè Deo hujus rei causa adscribitur.

§. 20. Sunt tamen nonnulli, qui dicunt, Deum in Lingvarum confusione usum fuisse hominibus, tanquam causis instrumentalibus Physicè concurrentibus ad confusionem lingvarum. Qui verò hoc defendunt, sententiam suam non eodem, sed variis admodum explicant modis, qvos prolixè enarrat Buxtorf. in Dissert. 2. & postmodum etiam refutat, qvapropter ea nolumus repetere. Alii Deo socios seu causas Medias intervenientes adjungunt, dicentes, Deum 70. Angelos adhibuisse, & cum eis confusionem effecisse 70. Lingvarum, postea unicuique populo horum unum præfecisse. Et Fundamentum, ut apparet, hujus suæ sententiæ ponunt in eo, qvòd Deus unicus, in plurali numero, veluti colloquens & consultans cum aliis, dicit: Descendamus & confundamus labium eorum. Inter qvos præprimis est Paraphrastes Jonathan, in translatione v. 7. & 8. cap. XI Gen. & R. Elieser in Pirke, cap 24. Qvam interpretationem etiam ex Patribus Christianis arripuit Origenes Homil. super Num. nec non Augustinus Lib. 16. de C. D. cap. 6. qui tamen dubitanter & hæsitanter omnia profert.

§. 21. Verùm nulla hic Angelorum, tam in Decreti divini, qvam in ejus Exequutionis expositione, sed solius יהוה Dei fit mentio. Neqve opus hoc Lingvarum Confusionis est opus Angelorum, sed opus Dei, & qvidem tale, in quo nullo modo videtur ministeriali Angelorum opera esse usus. Ita etiam, cùm simile ferme opus, dum Lingvarum donum infundebat hominibus Deus in die Pentecostes olim in Apostolis operatus esset, non legimus, Angelorum operâ id effectum dedisse Deum, sed in momento & miraculosè planè, aq; adeò immediatè Spiritum S. esse operatum. Deinde si Angelos alloquitur fuisset, cum quasi æquales Deo hic